

<http://balkans.aljazeera.net/vijesti/posljednji-poziv-za-spas-bhrt>

Posljednji poziv za spas BHRT-a

Evropski emiteri apeliraju na bh. parlament da osigura sistem finansiranja javnog servisa.



Konferenciji prisustvuju predstavnici parlamenata, vlada, predstavnici međunarodnih organizacija, institucija i ambasadaAnadolija

Na inicijativu Radiotelevizije Bosne i Hercegovine (**BHRT**) i Udruženja BH novinari, uz podršku međunarodnih institucija, u Sarajevu je počela dvodnevna konferencija "Nacionalni radiotelevizijski servis u BiH", u cilju pronalaženja rješenja za opstanak javnog servisa u BiH.

Generalni direktor BHRT-a Belmin Karamehmedović istakao je da je konferencija "posljednji poziv za spas javnog radiotelevizijskog servisa BiH".

"Pretpostavljam da svi manje-više znate da je situacija u BHRT-u, posebno u zadnjih par mjeseci, zbog nedostatka finansijskih sredstava, jer nije obezbijeđen adekvatan način stabilnog finansiranja, više nego kritična i s obzirom na to da već krajem ovog mjeseca imamo najave da jedan od preostala dva dominantna telekoma koji kako-tako prikuplja taksu, a to je m:tel, prestaje s tom praksom. Definitivno su sva zvona za uzbunu upaljena i ova konferencija je zaista posljednji poziv domaćim predstavnicima vlasti da nešto učine kako BiH ne bi postala jedina država u Evropi koja nema svoj javni servis", rekao je Karamehmedović.

Apel političarima

Ingrid Deltenre, generalna direktorica Unije evropskih emitera (EBU), istakla je kako je veoma važno govoriti o medijima u BiH, jer su bitni kako za društvo, tako i za demokratiju i ekonomiju zemlje, javlja Anadoluja.

"Isto su bitni kao i ostali sektori u društvu - bolnice, škole, ceste, kompletna infrastruktura. Mediji imaju jednako važnu ulogu. U većini zemalja postoji dualni sistem u kome imate sistem privatnih i javnih medija. Javni mediji imaju snažniju ulogu kada je u pitanju društvo jer pružaju ne samo informacije, već trebaju da služe stvaranju jedinstva i osjećaja zajedništva u datoj zemlji, u datom društvu, istovremeno pružajući i informacije i edukaciju i zabavu", rekla je Deltenre.

Ocijenila je da u BiH takav dualni sistem ne funkcioniše na ispravan način.

"Nismo ovdje da govorimo kako i šta da radite, već da s vama razmijenimo neke svoje ideje, iskustva i prakse. Mi zapravo sa sobom nosimo jedan apel koji upućujemo vlastima, vladi, a posebno parlamentima - da osiguraju slobodno i kvalitetno funkcioniranje javnih medija u BiH", poručila je Deltenre.

Istakla je da je neophodna hitna reforma javnog sistema u BiH i da bi cjelokupno društvo i svi mediji trebali raditi na tome.

"Apeliramo na političare, a prvenstveno na parlament da osigura sistem finansiranja ove kuće i da BHRT zaista bude javni medij u službi javnosti u skladu sa svim onim što EU smatra svojim osnovnim standardima", poručila je Deltenre.

Sloboda izražavanja

Patrick Pennicks, voditelj Odjela za informacijsko društvo Vijeća Evrope, svoje obraćanje na konferenciji je započeo riječima "ovo su dramatična vremena" u kojima, kako je kazao, sarkazmu više nema mjesta.

Istakao je da su osnovni principi na kojima se zasniva rad Vijeća Evrope principi zaštite ljudskih prava, slobode izražavanja, zaštite rada novinara i medija.

"U vrijeme populizma i lažnih vijesti potrebno je da se čuje glas koji je nezavisan, potpuno slobodan od bilo kakvog uplitanja i utjecaja vlasti. Moramo biti u stanju ustati i govoriti istinu slobodno", rekao je Pennicks.

Istakao je da se glas javnosti mora čuti, one koja predstavlja i manjine i većine te da mora postojati sloboda izražavanja svih različitosti koje moraju biti i u ovom sektoru javnog emitiranja.

"BHRT je na rubu bankrota, bit će to prvi slučaj javnog emitera u Evropi da se nađe u ovoj situaciji. BHRT ima pravo da kao takav ostane, ne samo radi prava, već zato što treba da omogući javno emitiranje koje je nepristrasno i slobodno u svakom pogledu. Prazne riječi više ne mogu pomoći. Ono što nam je potrebno je djelovanje", poručio je Pennicks.

Ismir Jusko, ministar prometa i komunikacija Bosne i Hercegovine, kazao je da bi više volio da je ova konferencija obilježena time kako je spašen javni servis.

"Ovo je momenat kada se više ne možemo vratiti nazad. Opredjeljenje našeg Ministarstva je jasno od samog početka. Mi smo partner BHRT-u i u potpunosti se stavljamo na raspolaganje i budite uvjereni da se ovo Ministarstvo pitalo, da možemo predložiti neka rješenja, ona bi već odavno bila na stolu. Očekujemo od odbora sistema da će što prije početi sa revizijom postojećeg zakona. Ovo Ministarstvo je donijelo određene odluke kojima je finansijski data podrška javnom servisu, ali to je samo gašenje požara. Promjena zakona, donošenje rješenja kojima će se stabilizirati naplata RTV taksi je jedini mogući način da se riješi problem", rekao je Jusko.

Konferenciji prisustvuju predstavnici parlamenata, vlada, predstavnici međunarodnih organizacija, institucija i ambasada, kao i eksperti koji će razgovarati o mogućim rješenjima krize i o adekvatnoj primjeni standarda Vijeća Evrope i Evropske unije.

Konferencija se održava u zgradi BHRT-a, a organizirana je u saradnji s EBU-om, Vijećem Evrope, OSCE-om, Evropskom federacijom novinara (EFJ) i Medijskom organizacijom jugoistočne Evrope (SEEMO).

Izvor: Agencije